

**EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO**



VASEGA FEOLOLO



AUKUSO - TESEMA

2021

FA'ASOLOGA O MATAUPU VASEGA FEOLOLO

VAEGA I: E FINAGALO LE ALII IA TATOU FESO'OTA'I ATU MA IA

MATAUPU 02: Aokuso 08, 2021 “O ala o le Atua” Roma 11: 25-36

MATAUPU 03: Aokuso 15, 2021 “O le alofa e le na'o upu” Luka 9: 51-56

MATAUPU 04: Aokuso 22, 2021 “Sa usita'i Filipo i le mea na fa'asino i ai e le Alii.” Galuega 8: 26-35

MATAUPU 05: Aokuso 26, 2021 “SUEGA”

VAEGAI: IA FAI TATOU MA TAGATA TALA'I

MATAUPU 06: Setema 05, 2021 “O le Tala Lelei” Roma 1: 1-16

MATAUPU 07: Setema 12, 2021 “Ia tumau i le Atua” Iopu 2: 6-10

MATAUPU 08: Setema 19, 2021 “Ia loto fesoasoani” Mareko 9: 20-29

MATAUPU 09: Setema 26, 2021 “SUEGA”

VAEGA III: IA AMATA IA TE OE FA'ATA'ITA'IGA LELEI

MATAUPU 10: Novema 07, 2021 “Ia fai la tatou galuega” Mataio 14: 13-21

MATAUPU 11: Novema 14, 2021 “Ia galulue fiafia” Fa'ataoto 31: 10-17: 24-28

MATAUPU 12: Novema 21, 2021 “A le afu le muaulu, e te le maua se mea lelei” Iona 2: 1-10

MATAUPU 13: Novema 28, 2021 “E le lelei le fa'amauualuga” Luka 18: 9-14

MATAUPU 14: Tesema 05, 2021 “O le nofoaga na fanau ai Iesu” Mataio 2: 1-12

MATAUPU 15: Tesema 12, 2021 “SUEGA FA'AI'U”

**VASEGA FEOLOLO
AOKUSO – TESEMA 2021**

VAEGA I: E FINAGALO LE ALII IA TATOU FESO'OTA'I MA IA

AOKUSO 08, 2021

MATAUPU 02: O ALA O LE ATUA.

TUSI FAITAU: Roma 11: 25-36

SINI: Ia malamalama tamaiti i le taua o le iloa o ala o le Atua e fa'aolaina ai tagata.

FESOASOANI MO LE MATAUPU:

I le tatou mataupu o lenei taeao e tusa ai ma le tusi lea sa tatou faitauina, o lea ua fa'apupula mai ai e le aposetolo o Paulo e ala i lana tusi i le Ekalesia i Roma, o ala o le Atua, e faigata ona malamalama ai le tagata, se'i vagana le tagata fa'atuatua. O le uiga tonu lea o le tusi lenei a Paulo. E ui i le agasala o Isaraelu ma o ese pea ma le Atua i le tele o taimi, ae le mafai ona ave'eseina ai le alofa o le Atua i lona nu'u, ona o le feagaiga na la osia ma lana auauna o Aperaamo.

Ae ina ua salalau atu le tala o le fa'aolataga i nu'u ese, o lea na toe a'oa'oina ai le mafaufau o Isaraelu, ma latou toe fo'i mai ai e talia Iesu Keriso o le Fa'aola. O le va'ai fa'a-le-fa'atuatua a le aposetolo, o mea ia, o ala lava o le Atua. E le malamalama i ai le tagata, ma o ala fo'i e faigata lava i le tagata ona iloa. O le ala fo'i lea e tu'u fesili ai pea le tagata ma fa'alua fesasi lona mafaufau i le feagaiga lea a le Atua ma lona nu'u o Isaraelu.

E pei lava fo'i ona ta'ua i le sini autu o lenei mataupu, o ala ia e ao ona malamalama i ai le tagata. O ala o le Atua e mafai ona fa'aolaina ai le tagata e tumau ma fa'atuatua ia te ia e le aunoa. O tatou fo'i le fanau, e faigata lava ona tatou malamalama i ia mea. O nisi taimi ua tatou manatu, a o'o mai faigata ma puapuaga, ona tatou manatu lea ua le alofa le Atua. Ae leai, o auala lava e faia e le Atua, ina ia tatou toe mafaufau loloto ai ma tatou toe fo'i atu ai ia te ia ma le loto fa'amaulalo.

O ala o le Atua, e fesuisuia'i mai pea i lea taimi i lea taimi. O le itu faigata lea ona malamalama i ai le tagata o lo'o fiafia pea e ola i le agasala. A'o le tagata fa'atuatua ma pipi'i pea i le Atua, e leai lava se mea e popole ai, aua o lo'o ia malamalama lelei i le natura o le Atua ma lona alofa tunoa. Manatua foi o le afio mai o Iesu, na faigata lava ona talia e tagata Iutaia ona e ese lo latou mafaufau na i ai. Na manatu lava i latou, o le Mesia lea o le a afio mai, e sau ma le pelu ma se tao, e ti'eti'e mai i se solofanua. E sau o ia o le toa na te fa'ato'ilalo fili o Isaraelu. Ae ua tete'i i le afio mai o le Mesia, e fanau mai i le fale o manu, e fiafia i tagata matitiva ma tagata mama'i, e talanoa foi i le filemu ma le loto maulalo.

A'o ala ia o le Atua e fa'aalia ai lona alofa. Ua le afio mai le Mesia e fa'aumatia fili o Isaraelu, ae ua afio mai le Mesia na te fa'aumatia ma fa'ato'ilalo le fili o le lalolagi, o satani. Aua o i tatou na fa'apologaina e satani i le agasala, ae ua fa'aolaina i tatou ma tatou manuia, ona o le fa'aolataga lea na saunia e le Atua e ala ia Iesu Keriso.

GALUEGA FA'ATINO: Taliga Fesili

1. Aisea ua fa'aolaina ai i tatou?

Tali: Ua fa'aolaina i tatou ona o le alofa tunoa o le Atua.

2. O le afio mai o Iesu, e mo ai?

Tali: O le afio mai o Iesu, e mo le lalolagi ina ia fa'aolaina.

3. O le a le manatu o Iutaia i le afio mai o le Mesia?

Tali: O le manatu o Iutaia, o le latou Mesia o le a sau e fa'aumatia fili o Isaraelu.

4. Aisea e fesiligia ai e le tagata le feagaiga a le Atua ma lona nu'u o Isaraelu i le tele o taimi?

Tali: E ala ona fesiligia e le tagata, ona o le le malamalama i ala o le Atua o lo'o fa'aalia i o tatou olaga.

PESE: Pese e 199 (Pese ma Viiga)

TATALO: Ia fai fa'atasi e le Faiaoga ma tamaiti le tatalo ua tu'uina atu.

Le Atua lo matou Tama, fa'afetai i au a'oa'oga ua matou fa'alogologo ai i lenei Aso Sa, e pei ona fa'amatalaina e Faiaoga. Ia e fa'amagalo i lo matou le usiusita'i ma le le fa'alogo i Matua fa'apea Faiaoga. Ia e fesoasoani mai foi i o matou olaga, ma ia e a'oa'o mai pea ina ia matou savavali pea i ou ala e manuia ai. Ona o Iesu lo matou Fa'aola... Amene.

AOKUSO 15, 2021

MATAUPU 03: O LE ALOFA E LE NA'O UPU

TUSI FAITAU: Luka 9:51-56

SINI: Ia malamalama le vasega, o le tagata ua mulimuli moni ia Iesu, e ao ona fa'atino le alofa i so'o se tagata.

FESOASOANI MO LE MATAUPU:

O le tatou mataupu o lenei Aso Sa, o se fa'amanatu lea mo i tatou i lo tatou taumafai atu ia mafuta ma Iesu lo tatou Alii. E le taua lo tatou fa'apea ifo – "O a'u lea ua ou mulimuli ia Iesu." E taua lo tatou fa'atino o uiga fa'a-Iesu i lo tatou ola, o a ia uiga? o le onosa'i, o le fa'amagalo, loto maualalo, alofa ma isi lava uiga lelei uma.

Fai mai a'o aga'i atu Iesu ma ona so'o i Ierusalem, na silafia lelei lava e le Alii, ua latalata mai taimi o ona puapuga. Le taimi o le a feagai ai ma faiga mataga a tagata agasala ia te Ia, se ia o'o lava ina maliu ai. O le ala lava lea o lana galuega fa'aola na afio mai ai, ma ua saunia foi o Ia mo ia taimi tiga. O le o'o atu la o Iesu ma ona so'o i le tasi aai o Samaria, na te'ena ai o Ia ma lana tala'iga. O tagata Samaria, o tagata e totolua. O tagata Iutaia ua fa'aipoipo atu i tagata o nu'u ese. Ina ua pulea e Asuria le malo i matu o Isaraelu, na omai ai tagata ese ua nonofo fa'atasi ma tagata Iutaia. Na tutupu a'e a latou fanau ma ta'ua ai o tagata Smaria. E tele fete'ena'iga na tutupu i le va o Iutaia ma Samaria, aua ua fenofoa'i tagata i Samaria.

E ui lava la ina le talia Iesu ma ona so'o e Samaria, ae na fa'asaga atu pea le malaga i Ierusalem. Na tiga so'o o Iakopo ma Ioane ina ua iloa lea mea i tagata Samaria, ona la fai atu lea ia Iesu. "Le Alii e, pe e te finagalo, ma te fai atu ia alu ifo le afi mai le lagi ia fano ai i latou." O le mana'o o nei so'o, ia fa'aumatia ma fasiotia tagata Samaria i lo latou te'ena o Iesu ma i latou.

Tou te iloa tamaiti, na faliu Iesu ma a'oa'i atu i a'i laua. Ua a'oa'o atu Iesu, o le atali'i o le tagata, e le'i sau o Ia e fa'aumatia le ola o tagata. Peita'i, ia fa'aola i a'i latou. Na ofo i latou ma latou iloa ai, o le tagata ua mulimuli ia Iesu, e le na'o upu ma tala e ta'uta'u ai le alofa, ae tataua ona fa'atino le

alofa ma ola ai. Ia alofa i tagata ua le alolofa mai. A agaleaga mai, ia alofa pea i ai, aua o uiga ia e finagalo ai Iesu, ia ola ma fa'atino e le tagata ua mulimuli ia te Ia.

O se a'oa'oga lelei foi lea mo i tatou le fanau, o ai ua ita mai ma fa'a-leaga mai ia'i tatou, ia fa'amagalo atu i ai ma tatou alolofa i ai. O uiga na fa'a-Iesu, e finagalo le Alii ia ola ai le tagata ua mulimuli moni ia te Ia. Ia alofa i so'o se tasi e pei fo'i ona alofa mai ai Iesu i a'i tatou tagata agasala, ona fiafia mai ai lea o Ia i a'i tatou uma.

GALUEGA FA'ATINO: Fa'atumu avanoa

Fa'atumu avanoa o fuaiupu o lo'o i lalo i upu nei: i le tasi aai, le talia, matua fa'asaga, faliu o Ia, muamua atu.

1. Na o'o atu Iesu ma ona so'o i le tasi aai o Samaria, ae na _____ o Ia e tagata.
2. Na iloa e Iesu le upu a Iakopo ma Ioane ma ua _____ ia i la'ua.
3. Ua tu'ua e Iesu ma ona so'o lea aai, ae agai atu i latou _____.
4. Na _____ atu Iesu i Ierusalem, aua ua latalata mai ona puapuaga.
5. Na auina atu e Iesu ona so'o e to'alua, e _____ ia te Ia i le aai.

PESE: Love is something that you give it away.

Alofa o se mea e te fa'asoa atu.

Fa'ai'u le vasega i le tatalo e saunia e se tamaitiiti.

AOKUSO 22, 2021

MATAUPU 04: SA USITA'I FILIPO I LE MEA NA FA'ASINO I AI E LE ALII.

TUSI FAITAU: Galuega 8: 26-35

SINI: Ia malamalama le vasega, sa fiafia lava ma usita'i Filipino e tala'i le Tala Lelei i nu'u na tofia i ai e le Alii.

FESOASOANI MO FAIAOGA:

I le taimi ina ua amata ona fa'asalalauina le Tala Lelei mai Ierusalem i Iutaia ma Samaria, sa to'atele lava le au Kerisiano na ofo atu le ola, e fai ma auauna aua ua tuputupu pea le Ekalesia a le Alii.

O le tasi o tiakono na fa'aosofia lona fiafia i le talaiga, o le tagata lenei o Filipino. A'o i ai o ia i Samaria e tala'i ai Keriso, to'atele tagata na liliuina ai ma talia le upu a le Alii, aua ua galue le Agaga o le Alii i a'i latou. Na tupu tele foi le fa'atuatua o tagata ona o fa'amalologa na ia faia i tagata mama'i.

O se tasi aso, na fa'atonuina ai e le agelu a le Alii Filipino, ina ia alu atu i le itu i toga (saute) i le ala mai Ierusalem i Kasa. Na tula'i o ia ma alu ma ia mafuta ai ma le tagata Aitiope. O Aitiope o se atunu'u e i Aferika oi Saute o Aikupito. O lenei tagata Aitiope, o ia o le eunuka, o le auauna sili foi a le tupu tama'ita'i o Aitiope o Kanate. O ia foi na te tausia oloa uma a le tupu.

Na fetau Filipino ma lenei eunuka, a'o ti'eti'e mai o ia i lana ta'avale, ua foi mai Ierusalem na alu e tapua'i ai. E ti'eti'e lava le eunuka ma faitau lana Tusi Paia, i se vaega o le tusi a le perofeta o Isaia.

Na valaauina Filipino e le Agaga ina ia alu atu o ia i le ta'avale e fa'atasi ma lea tagata. Na momo'e Filipino i ai ma fesili ia te ia po ua ia lagona ma malamalama i le tusi o ia faitauina.

Peita'i, e le malamalama lava le eunuka i tusi o faitauina. Na ia fa'apea atu foi ia Filipino, "Ou te mafaia fa'apefea, pe a le fa'asino mai e se tasi ia te a'u? Efa'apea foi tatou le fanau, afai e te faitau i le Tusi Paia, ma e maua ai se upu ma se fa'aupuga e te le malamalama i ai, e tatau lava ona e fesili i isi tagata e fesoasoani mai ia te oe. O le nonofo ai la o Filipino ma lenei tagata, na ia fa'amalamalama atu ai ia te ia le uiga o le tusi a Isai ana ia faitauina. (Faitau fa'atasi e tamaiti le Isaia 53: 7-8) O lo'o fa'atatauina lava lenei tusi ia Iesu Keriso.

Tamaiti, ai lava o le pogai lea na fa'asino ai e le Alii o Filipino e alu i le ala ua fa'asino e ui ai, ina ia fa'asalalauina pea ma a'oa'o tagata ia iloa le Tala Lelei o le fa'aolataga na faia e le Alii.

GALUEGA FA'ATINO: Saili fa'ai'uga sa'o o fuaiupu

1. Na fa'atonu e le agelu Filipino a) e fa'amalamalama le tusi na faitauina.
2. Na fetaia'i Filipino ma le eunuka e) o lo'o ia faitauina se vaega o le tusi a Isaia.
3. O lenei eunuka o le auauna sili i) e alu ifo mai Ierusalema i Kasa.
4. Na fa'alogu atu Filipino i le eunuka o lo'o ia faitauina o) e sau mai Aitiope.
5. Na mana'o le eunuka I se tagata u) a Kanake o le tupu tamaita'i o Aitiope.

Tali: 1. (i) 2. (o) 3. (u) 4. (e) 5. (a)

PESE: Pese masani a le Aoga Aso Sa – "Ua ou filifili, e mulimuli ia Iesu

A'OA'OGA:

1. Toaga e faitau le Tusi Paia
2. Talatalanoa ma lau uo ia Iesu
3. Usiusita'i i fa'atonuga a matua.

AOKUSO 29, 2021

MATAUPU 05: SUEGA

SINI: O le fa'amoemoe lava, ina ia fa'amanatu pea i tamaiti mataupu o lea Masina ma lea Masina, ia manatua ai pea tala o le Tusi Paia o lo'o fa'amatalaina e Faiaoga.

FESILI:

1. O le a le mea e taua ai le tatalo?

Tali: O le taua o le tatalo, e feso'ota'i ai le tagata ma le Atua.

2. O le a le masani a Tanielu e tusa ai ma le mataupu sa fa'amatalaina?

Tali: O le masani a Tanielu, o le tatalo i le taeao, aoauli ma le afiafi.

3. Aisea na o'o ai le fa'asalaga ia Tanielu?

Tali: Ona o taupulepulega leaga na o'o ia te ia.

4. Aisea ua fa'aolaina ai tatou?

Tali: Ua fa'aolaina i tatou ona o le alofa tunoa o le Atua.

5. O le Afio mai o Iesu, e mo ai?

Tali: O le Afio mai o Iesu, e mo le lalolagi atoa.

VAEGA II: Tali mai i le Sa'o po'o le Sese.

1. O uiga fa'a-Iesu o le onosa'i, loto fa'amagalo, loto maulalo, o le alofa, ma le agalelei.

Tali: Sa'o

2. O tagata Samaria o ni tagata e totolua.

Tali: Sa'o

3. Na o'o atu Iesu ma ona so'o i Samaria ma talia lelei e i latou.

Tali: Sese

4. O a'oa'oga a Iesu, a ita mai le isi tagata ia te oe ona e ita foi lea i ai.

Tali: Sese

5. O a ni a'oa'oga sa e maua mai i mataupu o lenei Masina? (Ia tu'u le avanoa e tali mai ai le fanau).

Ia saunia se pese ma fa'ai'u le vasega i se tatalo.

VAEGAI: IA FAI TATOU MA TAGATA TALA'I

SETEMA 05, 2021

MATAUPU 06: O LE TALA LELEI.

TUSI FAITAU: Roma 1: 1-6

SINI: Ia malamalama le vasega, o le Tala Lelei, o le tala o le fa'aolataga mo tagata uma ua fa'atuatua i le maliu ma le toetu o Keriso.

FESOASOANI MO LE MATAUPU:

O le Aso Sa lenei e masani ona fa'amanatuina pea e le tatou Ekalesia i tausaga ta'itasi, o le Aso Sa o le Tala Lelei. E fa'amanatu ai i a'i tatou le o'o mai o le Tala Lelei i Samoa. O le Tala Lelei, o le tala i le alofa tunoa o le Atua i le lalolagi agasala. O le alofa na fa'aalia e le Atua ia Iesu Keriso lona Alo pele, i lona maliu ma lona toetu manumalo ina ia magalo a tatou agasala.

E ui lava e le'i o'o Paulo i Roma e mafuta ma le Ekalesia i Roma, ae ua ia fa'aailoa atu ma lona agaga maulalo lava i tagata, o ia lava o le auauna a Iesu Keriso. Na valaauina foi o ia e le Alii e fai ma ana Aposetolo e tala'i lana Tala Lelei. O lona fa'amoemoe foi, e i ai lava le taimi e aumai e le Alii e mafuta ai ma i latou. I le tatou Tusi Faitau, o lo'o aumai ai e Paulo le Tala Lelei, e uiga ia Iesu Keriso le Alo o le Atua.

i) Na Afio mai o se tagata i le natura masani o le ola o le tagata.

ii) O Ia o se vaega o le aiga tupu fa'a-lutaia o Tavita

iii) O Ia na maliu ae na toetu mai le oti

iv) O Ia ua na tatala le faitoto'a mo le alofa tunoa o le Atua ma lona agalelei, ina ia sasa'a mai i o tatou luga.

Le alofa tunoa lea o le Atua na ta'u atu e Paulo i Kerisiano o Roma, lea ua latou maua foi a'o galulue ai o Aposetolo, e tala'i atu le Tala Lelei ia Keriso. O lona naunauta'iga lava, ia talia e tagata uma ma fa'atuatua i le suafa paia o Iesu Keriso. O Ia foi o le Tala Lelei, aua na ia fa'ataunu'u le finagalo o le Atua, e ala i lona maliu ma lona toetu. Ua maua ai lo tatou fa'aolaina mai le agasala, pe a tatou salamo mai le leaga o le agasala, a ia fa'atuatua i le suafa o Iesu Keriso.

A'OA'OGA:

1. O Iesu le Tala Lelei.
2. E finagalo le Alii e tala'i atu le Tala Lelei.
3. O le Tala Lelei, o le tala sili lea.

GALUEGA FA'ATINO: Fa'afetaui upu ma o latou uiga sa'o.

- i) aposetolo - o le alofa e aumai na o le Atua i le tagata agasala ua salamo ma talitonu ia te Ia.
- ii) fa'asinotonuina - usiusita'i
- iii) anaana - 'o le ua auina atu', o le tagata ua tofia e le Alii, e alu e tala'i le Tala Lelei.
- iv) alofa tunoa - fa'aILOA mai.

PESE: Tala'i, tala'i le tala lelei, le tala ia Iesu
Le tala i lona alofa, tala i lona maliu
Ou te le ma e tala'i, le tala ia Iesu
O le na maliu ma tanumia, le aso tolu na ia toetu.

Ia fa'ai'u le vasega i se tatalo.

SETEMA 12, 2021

MATAUPU 07: IA TUMAU I LE ATUA

TUSI FAITAU: Iopu 2: 6-10

SINI: Ia fa'amanatu ai pea i tamaiti le taua tele o le tumau i le Atua.

FESOASOANI MO FAIAOGA:

O le tatou mataupu i lenei taeao, o le taua o le tutumau i le Atua. O le tutumau i le Atua, o le tasi lea o ala manuia o le tagata e pei ona i ai le tala ia Iopu. Ua tatou iloa uma foi Iopu o le tagata sa maua i le ma'i papala. Ae e tele foi nisi mea mata'utia na tutupu i le aiga o Iopu a'o le'i o'o ia te ia le ma'i papala. E pei ona fa'aumatia ai ana lafu manu, o ana auauna atoa ai ma lana fanau. Fai mai le tusitala o le tagata lenei o Iopu, o se tagata ua sao lana amio i le silafaga a le Atua. O lona uiga, o le tagata ua suamalie ia te ia le feso'ota'i ma mafuta i le Atua i taimi uma. O le mafuaaga lea o le manuia o lona soifuaga atoa ai ma lona aiga; sa tele foi ma faula'i lona tamaoiga.

O le fesiligia e le Atua o Satani i le amataga o le mataupu lenei, po'o fea na sau mai ai. O le tau fa'amanino mai lea o le fuafuaga a le Atua o le a soso'o ai mol ana auauna o Iopu. O se ata foi i le fa'apupulaina mai o le tauiviga a le tagata e tumau i le Atua ma tofotofoga e o'o i lona soifuaga ona o fa'afitauli e tutupu i le finau mai foi o Satani e fa'asese i le talitonuga ma le fa'atuatua ua ta mau ai

le tagata i le Atua. O le vaega o le tusi sa faitauina, o lo'o fa'amatala ai le pule a Satani mai le Atua ma na fa'ao'o ai le ma'i ia Iopu, fai mai e amata a'e i ona alofivae, e gata ifo i lona tumua'i. A'o lea foi e fai mai, ua avane e Iopu le ta'ega ipu omea ma valu a'i i lona papala. O le fa'ailoga o le fa'anono manu o Iopu i le Atua ina ia alofagia ona mafatiaga. E feso'ota'i lelei ma le nofo ai o ia i le efuefu, e fa'ailoa ai lona salamo ma le loto maualalo aua ua ia talitonu; e le'i tutupu fua mea ia ia te ia.

O le taimi foi lea, ua leai se tasi e fia soso ia Iopu. O ana uo, o lona aiga; na o'o lava i lona to'alua ua fai atu ia Iopu; "ua e taofi mau pea ea i lau amiotonu? Ina faifai ia e oe o le Atua, ma e oti ai." O taumafaiga lava ia a Satani ua ui atu i le fafine ina ia fa'aseseina ai Iopu; ae peita'i e le'i mafai. Aua fai mai Iopu, a tatou talia ea na'o mea lelei mai le Atua, ae tatou te le talia ea mea leaga. O le talitonuga o Iopu o mea leaga, o tofotofoga mai le Atua e saili mai ai i le tagata po'o maua'a ma tumau pea lona fa'atuatua fa'amaoni i le Atua. O lea lava na ia onosa'ia ai le mamafa o tiga ma faigata, ma lona talitonuga, pau lea o le auala e fa'asaoina ai o ia. A fa'auau le tala se'ia o'o i le fa'aiuga, na toe manino ai le mata o le vai i mafatiaga o Iopu ma toe fa'afoi i ai e le Atua le tamaoaiga e tele.

Tamaiti, e i ai taimi e fa'aogaina ai e le Atua fa'afitauli e tofotofoina ai i tatou ma lo tatou ola fa'atuatua ia te Ia, aua e ese'ese lava auala a le Atua e saili mai ai ia te'i tatou. O le upu moni, a tatou le mataala ma tatou tumau pea i le Atua, o le a faigofie ona osofa'ia i tatou e le fili ma tatou o ese ai ma le Atua. O le mafua'aga foi lena e tutupu ai fa'afitauli i o tatou olaga, ona ua tatou tau mamao ma ala o le Atua.

A'OA'OGA:

1. E fa'aeaina i tatou pe a tatou tumau i le Atua.
2. E aveesea e le Atua o tatou tiga ma faigata pe a maua'a lo tatou fa'atuatua ia te Ia.
3. Tatou te loto tetele ma malolosi pe afai tatou te tutumau i le Atua.

PESE: Ou te tumau ma pipi'i mau x2
Le lalolagi taumafai e liliu ese a'u
Ou te tumau ma pipi'i mau.

SETEMA 19, 2021

MATAUPU 08: IA LOTO FESOASOANI

TUSI FAITAU: Mareko 9: 20-29

SINI: Ia fa'amanatu i le fanau, e finagalo le Atua ia tatou fesoasoani mo nisi tagata o lo'o fia maua le fesoasoani.

FESOASOANI MO FAIAOGA:

Lelei ona fa'atalanoa muamua le mataupu, ia fesili i tamaiti pe i ai se isi o tatou na fesoasoani i se isi tamaitiiti, po'o se tagata na man'omia se fesoasoani? (Tu'u le avanoa e tali mai ai le vasega) E taua tele lo tatou fesoasoani atu i tagata o fia maua se fesoasoani, pei o e o lo'o mama'i, o e o lo'o fia 'a'ai, ma e o lo'o ola pea i le agasala. O le uiga lena o le tatou mataupu i lenei Aso Sa.

Ae o le tatou tusi faitau o lenei aso, fai mai ina ua aumai e le tasi Tama o lona atalii ma'i ia Iesu ina ia fa'amaloloina, sa taliaina lava e le Alii ma fesoasoani i ai. O lenei atalii, ua i ai le agaga gugu. Ina ua iloa atu e ia o Iesu, ona fa'ata'afiti loa lea o ia e le agaga, ma pa'u ai i le eleele. Ua ta'afilifili solo o ia ma ua faua lona gutu. Na fesili Iesu i le Tama, "Talu mai anafea ona o'o o lona mea ia te ia?" Na tali le Tama, "Talu ina o tamaitiiti." Na ia fa'apea atu foi ia Iesu, "Ua lafo so'o foi o ia ia te ia i le

afi...ma le vai ina ia fano ai o ia.” O lona uiga sa manatu lava le Tama ma le aiga, o le pa’u so’o o le atalii ma’i i le afi ma le vai, e fa’aumatia ai le agaga leaga oi totonu o le atalii. Peita’i, e le’i mafai lava e ia mea ona malolo ai le ma’i. Na fetalai atu Iesu i le Tama... “E mafaia mea uma lava i le fa’atuatua.” O lea taimi na alaga ai loa le Tama o le tama, “Le Alii e, ua ou fa’atuatua; ia e fesoasoani i lo’u le fa’atuatua.” O le taimi lava lea na fetalai atu ai loa Iesu.. “O oe na, le agaga gugu ma le tutuli, ou te fai atu lava ia te oe, ina e alu i fafo ia te ia, ‘aua foi e te toe alu i totonu ia te ia.” Na alu i fafo le agaga leaga, a ua liua le tama pei ua oti. Peita’i na tago ifo Iesu i lona lima ma fa’atu ia te ia, ona tula’i lea o ia.

A’o matamata ma molimau le au so’o o le Alii i le fa’amalologa na faia e Iesu, na fa’ate’ia i latou ina ua fa’aola e le Alii i lenei tagata ma’i. Na latou taumafai foi e tuli ese lea agaga leaga, ae latou te le’i mafaia. O lea na fetalai atu ai Iesu i a’i latou... “Ua na o le tatalo e mafai ai ona o ese o mea fa’apena.” O le tatalo o le tatou feso’ota’iga lea ma lo tatou Alii. O le ki lea na te tatalaina le fa’atuatua i o tatou olaga. O le tatalo foi, o le fa’ailoga o lo tatou fa’alagolago atu i le Alii, ma le agaga maulalo lava ina ia fa’atumu i tatou i le fa’atuatua ma le malosi.

Tamaiti, e finagalo Iesu tatou te fesoasoani i isi tagata. Na ia fa’ sino mai ina ia tatou tatalo atu ia te Ia, ma le fa’atuatua, aua o Ia lava e fesoasoani atu ai i le ua mo’omia se lavea’i.

A’OA’OGA:

1. E mafaia mea uma i le fa’atuatua.
2. Tatalo i le Alii pe a tutupu mea fa’apea i o tatou olaga.
3. Loto fesoasoani pei o Iesu.

GALUEGA FA’ATINO: Uiga o upu

- i) fa’ata’afiti - tafiti solo tau le mafai ona taofiofi. (convulsed)
- ii) ta’afilifili - ta’avalevale solo (wallowed)

Tali mai fesili

1. O le a le mea na tupu i le atalii ma’i, ina ua iloa atu Iesu?

Tali: Na fa’ata’afiti o ia e le agaga ma pa’u ai i le eleele, ma ua ta’afilifili solo.

2. Sa fa’apefea ona fa’amalolo e Iesu le atalii ma’i?

Tali: Na ona fetalai o Iesu, ina e alu ia te ia, ‘aua foi e te toe alu i totonu ia te ia, ae le gata i lea, na tago foi Iesu ma fa’atu ia te ia, ona tula’i lea o le tama.\

3. Aisea na le mafai ai e le au so’o o Iesu ona fa’amalolo le atalii ma’i?

Tali: Ona e le fa’atuatua le au so’o.

PESE: fati o le pese...Savali ma oso ma vivi’i i le Atua.

Fesoasoani i le ua vaivai

Fesoasoani i le ua ma’i

Tatalo ma le fa’atuatua

Le Alii, e alofa mai i a’i ta’ua.

Ia a’o le pese i le fati masani ua tu’uina atu i luga, ma fa’ai’u le vasega i se tatalo.

SETEMA 26, 2021

MATAUPU 09: SUEGA

SINI: Ia su'esu'eina ai pea mafaufau o tamaiti, ina ia latou taofi mau pea i mataupu mai le Tusi Paia, o lo'o a'oa'oina ai pea i lea Aso Sa ma lea Aso Sa.

FA'AMANATU MO FAIAOGA: Fa'amolemole faiaoga, e lelei lava ona fa'ataunu'u pea le faiga o tatou suega, ma ia saunia lelei ni kopi mo le vasega. E mafai foi ona sui fesili pe a finagalo e sui pe fa'aopopo foi. Ia manuia le tapenaga.

FESILI:

1. O le a le uiga Tala Lelei?

Tali: O le tala i le alofa tunoa o le Atua e ala i le fa'aolataga ia Iesu Keriso.

2. O le a le finagalo o Iesu mo i tatou e uiga i le Tala Lelei?

Tali: E finagalo Iesu, ia tatou o atu e tala'i atu le Tala Lelei.

3. O ai le Tala Lelei?

Tali: O Iesu o le Tala Lelei.

4. O le a le uiga o le upu 'Aposetolo'?

Tali: O le ua auina atu, po'o le tagata ua tofia e le Atua e tala'i le Tala Lelei.

5. O le a le isi uiga o le upu 'anaana'?

Tali: O le 'usiusita'i'.

6. O a upu galue e tolu o lo'o aumai i le mataupu mulimuli?

Tali: ole atu, saili ma le tu'itu'i.

7. O le a le uiga o le upu 'ta'afili'?

Tali: O le ta'avale solo.

8. O le a le fetalaiga a Iesu o lo'o fa'amatala ai le foa'i a le Atua i le tagata?

Tali: "Afa'i tou te avatu o mea lelei ia outou fanau, e le sili ea ona foa'iina mai e le Tama oi le lagi o mea lelei i e ole atu ia te Ia."

9. O a uiga masani o le tagata tatou te vaaia i le ola saili?

Tali: O uiga masani o le tagata, o le fiu gofie e saili i le Atua.

10. O le a se a'oa'oga taua sa e maua mai i mataupu o lenei Masina sa fa'amatalaina?

Malo le tapena fa'afetai le saunia lelei o le suega a le fanau mo lenei Aso Sa aemaise o le Masina atoa. Ia fa'amanuia pea le Atua e tusa o lo outou tautiga i lana galuega. Ia saunia se pese ma fai se tatalo e fa'auma ai le suega.

IA MANUIA TELE LE ASO SA!!

Mo le Masina o Oketopa, o le tapenaga o le Lotu Tamaiti ma le malologa masani o le Lotu Tamaiti. Ona toe amata lea o Aoga Aso Sa ia Novema. Ia manuia tapenaga mo le Aso Sa o

NOVEMA 07, 2021

MATAUPU 10: IA FAI LA TATOU GALUEGA.

TUSI FAITAU: Mataio 14: 13-21

SINI: Ia malamalama le fanau o tatou uma ua filifilia e Iesu e fa'atinoina lana galuega fa'aola i lenei lalolagi.

FESOASOANI MO LE MATAUPU:

Ina ua fa'alogu Iesu i le tala na aumai e ona so'o e uiga i le oti o Ioane le Papatiso ma mea um ana faia e Herota ia te ia, na ia maliu ai loa i se nofoaga tu'ufua ma nofo ai. E le o ta'ua mai e Mataio pe aisea na mana'o ai le Alii e tuua na o ia i lea nofoaga, pe ai ona o lona fa'anoanoa i le me aua tupu ia Ioane le Papatiso, po ua finagalo foi e fai sina ana malologa. Peita'i, o le tuua ai na'o ia i lea nofoaga, o se avanoa lelei lea mo le motu o tagata o lo'o mulimuli atu e fia fa'alogologo i ana a'oa'oga, ma va'ava'ai i vavega e tele n ate faia. E ui lava la i se lagona mafatia o Iesu, ae ua le avefa lea mafatiaga ma ala e taofia ai le galuega a le Tala Lelei, e fa'aolaina ai le tagata ua galala e fia maua le ola ma le malosi mai ia te Ia.

E tusa ma le molimau a Mataio, ina ua silafia e Iesu le motu o tagata, ona mutimuti vale ai lea o lona alofa ia te'i latou. O lona uiga, e ui i se mafatiaga fa'a-le-tino ona o mea sa tutupu, e pei ona faia e Herota ia Ioane le Papatiso, ae sa fa'amalosia pea lona itu fa'a-le-agaga, le ala lena o le tupu a'e o lona alofa mutimuti vale, se'i fa'amalolo tagata mama'i, ma fafagaina le ola fa'a-le-agaga o tagata i le upu o le ola e uiga i le malo o le Atua.

O le mau a nisi o tagata su'esu'e o le Tusi Paia, o le tala lava lenei e tasi o lo'o toe fa'amauiina i le (Mataio 15: 29-39), pe a fua i le tutusa o vavega na faia e Iesu, o le fa'amaloloina o tagata mama'i, ma le fafagaina o le to'atele o tagata na lolofi atu ia te ia, peita'i mo Mataio lava ia, e ese'ese ia tala e lua ma e tofu foi ma lona a'oa'oga o lo'o momoli mai ai. O le tala i le fafagaina o le limagaafe (Mataio 14: 13-21) o lo'o tupu i eleele o Iutaia i le itu i sisifo o le vai i Kalilaia, ma o le feau mo Iutaia, o a fa'afitauli e tutupu, fia 'aai, fia feinu, sauaina ma isi, o lo'o i ai lava le Atua na te fafagaina ma fa'aolaina i latou. O ato foi e sefululua na maua i toe 'aiga na totoe, ua fa'asino tonu lava i ituaiga e sefululua o Isaraelu.

A'o le fafagaina o le to'afagaafe (Mataio 15: 29-39) o lo'o tupu i le itu i sasa'e o le vai i Kalilaia, ma o elel'ele foina o nu'u ese. E fua lava lea manatu ona o le tala o lo'o fa'amauiina i le mataupu lava lea (15: 21-28), e uiga i le fafine Kanana ma lana tama teine na maua i le ma'i temoni. O lona uiga, o le galuega alofa a Iesu na te mafai foi ona ia fafagaina tagata o nu'u ese e pei foi ona faia i tagata Iutaia. O ato foi e fitu na maua i toe 'aiga na totoe, ua fa'atusaina i nu'u e fitu e taunu'u atu Isaraelu i Kanana o lo'o i ai.

Ua o'o i le afiafi ona augani atu lea o le au so'o ia Iesu ia tu'u atu le motu o tagata ina ia latou o i aai e fa'atau ni meaai ma latou, aua e le gat aua leva le aso a o le nofoaga tu'ufua foi o lo'o latou i ai. E lelei foi le fa'amanatu a le au so'o ia Iesu, ona o lo latou manatu alofa i tagata, peita'i e ao ona latou iloa, o lo'o latou fa'atasi ma Iesu, e leai se mea e faigata ia te ia, ma e tatau i lona au so'o ona tu'u atoatoa lo latou fa'atuatuga ia te ia, na te faia ai vavega mo le tausiga o le motu o tagata. Na tali Iesu i ona so'o "*ia outou avane ni mea latou tea ai ai*" O le finagalo o Keriso, ia mataala lona au so'o i le feau ma le galuega ua valaauina ai. Afai na taulamua Keriso e faia galuega alofa i tagata, e tatau foi i ona so'o ona latou faia galuega lelei e fa'aolaina ai tagata. E le'i finagalo Iesu e tu'uina atu tagata e o ina ia fano i le matelaina i le ala. O fea o le a o i ai, o lo'o i ai Iesu o le puna o le ola? Ua le mafai ea e Iesu ona faia se vavega e maua ai ni meaai e fafagaina ai tagata? E tatau i ona so'o filifilia ona latou fa'atinoina le galuega ma le fa'amoemoe e fa'aatoatoaina e Iesu.

Na faia e Iesu le vavega, i areto e limagafua ma i'a e lua lau ona ia fafagaina ai lea o le motu o tagata. E leai lava se ese'esega ma le tala i le fafagaina o Isaraelu i le vao i le manai mai le lagi (Esoto 16). Peita'i o le fafagaina e Iesu o le motu o tagata, o le fa'aailoga lava o ia o le manai na auina mai le lagi e fa'aola tagata uma. O le (Mataio 14: 19) o lo'o i ai upu galue: fa'afetai, tofitofi ma le avatu, ua fa'apena foi le galuega na faia e Iesu i le taimi o le latou talisuaga mulimuli ma ona so'o a'o le'i fa'asatauroina.

O le aotelega o manatu, o le galuega ua valaauina ai e Iesu ona so'o e le faigofie, ae e mafai ma lelei mea uma pe a fa'alagolago i le Agaga o le Atua. Fai mai la tatou mataupu **"Ia fai la tatou Galuega"** o lona uiga, ua tu'uina mai e Keriso le galuega o le Talalelei e fa'aauuina e ona so'o, latou te fafaga ma tausi tagata uma i le upu o le ola mai Afioga a le Atua. E pei ona fetalai Iesu ia Peteru *"ia e fafaga i a'u mamoe"* e fa'apena le finagalo o le Alii mo e uma ua ia valaauina e fa'atinoina lana galuega. Ia latou fafagaina tagata e le gata o meaai fa'aletino ae sili i meaai fa'a-le-agaga. O le galuega fa'aleoleo mamoe, e fai e tatou, ina ia manuia tagata uma ae fa'asilisili ai le viiga o le Atua.

GALUEGA FA'ATINO: Fesili fa'atupu manatu mo le fefa'asoa'iga

1. Aisea na finagalo ai Iesu e maliu atu i se nofoaga tu'ufua?
2. Fa'apefea ona lava le fafagaina o tagata e silia ma le 5000 i ni i'a e lua lau ma saito e limagafua?
3. Finagalo le Alii e saili e ona so'o ni meaai ma tagata, Aisea?
4. O le a se ese'esega o le (Mataio 14: 13-21) ma le (Mataio 15: 29-39)

PESE: 184 (Pese ma Viiga)

A'OA'OGA:

1. O tatou o auauna galulue mo Iesu ma lana galuega
2. Ia fa'amaoni i tofiga ese'ese ua valaauina ai i tatou.
3. Tatou te fa'amoemoe i le mana o Iesu ae le o le malosia fa'a-le-tagata e fai ai le galuega.
4. Fa'asoa lou alofa i so'o se tasi.

Ia fa'ai'u le vasega i se tatalo.

NOVEMA 14, 2021

MATAUPU 11: IA GALULUE FIAFIA

TUSI FAITAU: Fa'ataoto 31: 10- 17; 24-28

SINI: Ia a'oa'oina pea le fanau i le taua o le galulue fiafia, aua e maopoopo ai so'o se mafutaga, ma i'u ai i le manuia se galuega.

FESOASOANI MO FAIAOGA:

O le galulue fiafia, o se lagona e fa'aosofia ai tagata e galulue mo le leleiga o se fa'amoemoe o lo'o taumafai i ai, E una'ia tagata e fai se mea lelei mo le ta'uleleia o se aiga, o se nu'u po'o se Ekalesia. E faigofie ai foi galuega fai mo le atina'eina o so'o se fa'alapotopotoga, aua e mama se avega pe a pulupulu lima fa'atasi tagata uma ma le fiafia. Ae a leai foi se fiafia i se mafutaga, e vave foi ona fa'ama'amulu ma ta'apeape, ma e le fia galulue foi tagata.

O le tusi o Fa'ataoto, o lo'o i ai i totonu o tusitusiga a le potu i le fa'atulagaina o tusi o le Tusi Paia. O tusitusiga e fa'ataata i le gasologa o le soifuaga, ma le amio e tatau mo le ola o le tagata aemaise lava i totonu o aiga, i le va o matua ma fanau fa'apea foi i le tane ma le ava. O le vaega o le mataupu

sa o tatou faitauina, o lo'o fa'amatala ai e Lemueli mai le valoaga a lona Tina na a'oa'oina ai o ia fa'atatau i le uiga o le ava amio lelei; po'o le mataala ma mata'alia i le tausiga o lona aiga. O le Tina e galue ma le loto fiafia ina ia fua mai ana galuega lelei mo le manuia o lona aiga. O lea e pei ona fai mai ai le fuaiupu e 13, "Na te sailia fulufulu mamoe ma lino; ua galue ai ona lima ma le fiafia." Ioe, o le ala tonu lea e silisili ai lona tau nai lo penina. E silisili aua ua na'o mea lelei lava na te faia, a o fua ia o lona loto fiafia e tapena ai mea mo ia ma lona aiga.

E le o se tagata e fa'alologologo tiga pe fiu gofie, ae fetala'i lona mafaufau i mea e manuia ai lona aiga. O ona uiga ia lea e tupu ai lona malosi e pei ona fai mai, na te fusia lona sulugatiti i le malosi; na te fa'amalosia ona lava lima. I le fuaiupu e 17 fai mai, e tupu lona malosi ma tupu pea ona o lona loto fiafia i galuega a ona lima ma le manuia ua ia maua mai ai. O le mea foi lea e ofu ai o ia i le mamalu ma ataata i aso o lumana'i, e le 'ai foi o ia i mea e 'ai a le paie aua ua lava taoso lona va'a moa so uma ma lona aiga ina ua tautala o ia ma le poto, ua i lona laulaufaiva le Tulafono o le alofa.

O le galue fiafia o lenei Tina e mafai ona a'oa'oina ai le to'atele, e le gata i tagata ta'ito'atasi; a'o fa'alapotpotoga tetele e pei o aiga, nu'u, Ekalesia ma so'o se fa'alapotpotoga lava i le taua o le galulue fiafia. O a fa'afitauli e tutupu mai ae le mafai ona fa'avaivaia ai i tatou e galulue pea aua se manuia o nei ma a taeao. E mafai foi ona lelei ma i'u manuia galuega fai pe a fusia o tatou sulugatiti i le malosi ma fa'amalosia o tatou tagata e galulue ma le fiafia, e fa'aofuina ai i tatou e le Atua i le mamalu ma tatou le atuatuvaile ai i aso o i luma. Ia aunoa ma le fa'apaie a ia tatou tautalatala ma le poto ma ia tumau i tatou i le alofa e manuia ai a tatou galuega fai.

GALUEGA FA'ATINO: Taliga Fesili

1. O a mea e sailia e le ava amio lelei e galue ai ona lima fa'apei ona ta'ua i le Tusi Faitau?

Tali: Na te sailia fulufulu mamoe ma lino.

2. I le fuaiupu e 14, o le a se mea o fa'atusaina ai lenei ava amio lelei?

Tali: O lo'o fa'atusaina i le va'a o e fa'atau oa; e mamao le mea e aumai ai ana mea e 'ai.

3. O le a le taimi o le aso e amata ai galuega a le Tina lenei e pei ona ta'ua i le mataupu?

Tali: E amata ana galuega a o po lava.

4. Aisea e le mativa ai o ia i se mea e tasi?

Tali: E le mativa o ia i se mea e tasi ona e galue ma le fiafia.

5. O a la ni a'oa'oga taua ua e maua i lenei tala?

PESE: 177 (Pese ma Viiga)

A'OA'OGA:

1. E taunu'u manuia galuega fai pe a tatou galulue fiafia.

2. Ia vaai mamao mo le lumana'i ma a taeao.

3. Galue mo le viiga o le Atua ae le o tagata.

Ia fa'ai'u le vasega i se tatalo.

NOVEMA 21, 2021

MATAUPU 12: A LE AFU LE MUAULU, E TE LE MAUA SE MEA LELEI.

TUSI FAITAU: Iona 2: 1-10

SINI: Ia malamalama le vasega, o le ola i mea faigata o le olaga, e lu'itauina ai le tagata ma na maua ai foi se taunu'uga lelei o lona ola.

FESOASOANI MO LE MATAUPU:

Tamaiti, e 'ese le taua o le tatou mataupu o lenei Aso Sa. O lona taua, aua tatou te le maua se mea lelei, pe a tatou le tiga'ina. E tupu lou iloa fai feau i le aiga, pe a e tigaina i feau ma auauna lelei i ou matua. E te le nofonofo foi ma paie i le aoga e le faia ni au meaaoga, ona maua lea o le poto. E tatau ona su'esu'e i meaaoga ma tauivi i faigata o le ola a'oa'oina, ona suamalie lea ia te oe le poto. E tele isi vaega o lo tatou olaga, e fetau lelei ma le tatou mataupu.

O Iona le atalii o Amitai, o le perofeta a le Atua. O lo'o ta'ua i le mataupu muamua o le tusi o Iona, na valaauina o ia e le Atua e alu e tala'i lona finagalo ma alaga le feau o le salamo i tagata o Nineva, mai a latou agasala. Peita'i, na lafoa'i e le perofeta le upu a le Atua, ae ua sola i le va'a i le isi nu'u o Tasesa le igoa. Na sousou le vasa, ona lafo ai lea o Iona e le au va'a i le sami, aua na iloa e tagata, ua sola o ia ai luma o le Alii. O i'ina na saunia ai loa e le Atua le i'a tele ma foloina ai loa Iona.

I le tatou mataupu o lenei Aso Sa, ua tatou malamalama ai i puapuaga na o'o ia Iona, a'o i ai o ia i le manava o le i'a. Sa matua fememea'i le perofeta, aua ua na iloa ua si'omia o ia e faigata. O lona i ai i le moana i totonu o le sami, o lona tu'ugamau lea aua ua si'omia o ia e galu ma peau. Na ia manatu lava, ua lafoa'iina ma fa'agalo e le Atua o ia, ma ua fai ma mafua'aga o le vaivai ai o lona loto i totonu ia te ia. O ona mafati'aga uma nei na tutupu ifo, a'o i ai i le manava o le i'a. Ma ua manatu ai lava, o ia lava le pogai o le tutupu o mea tig aua la feagai.

Peita'i, o totonu lava o lea nofoaga pogisa, na alaga mai ai Iona i lona Atua mo se lavea'i. Sa tatalo o ia mai totonu o le i'a, ma na fa'afogaina e le Atua. Tamaiti, o le tatalo, e mafai lava ona e tatalo i le Atua i so'o se mea, i so'o se taimi foi e te mo'omia ai lana fesoasoani mo tatou. E le fa'apea foi, se'iloga e maua le tagata i puapuaga, ona fa'atoa tatalo lea i le Alii, pei o Iona. E tatau ona tatou mafuta ma lo tatou Atua i so'o se taimi. O le alofa tunoa o le Atua e tele pea lea mo le tagata ua feagai ma lu'itau ogaoga, pe a tatalo atu ma le fa'atuatua.

O le olataga na faia e le Atua mo Iona, o se a'oa'oga foi lea mo le perofeta i le fia fa'aogaina pea o ia i le galuega tala'i a le Alii. O le valaauina o ia e fai ma perofeta, o lana matafaioi lea na tofia ai, ina ia fa'aailoa atu i tagata le finagalo o le Atua, ae le o le sola 'ese e le fiat alia ma usita'i i le Atua. Ui i lea, o le tala ia Iona, na toe fialia lava o ia e alu e fa'ataunu'u le valaauina muamua. E a'oa'oina ai foi tatou tamaiti, tatou te maua le fialia ma fa'amanuiaga mai le Atua, ina ua tatou finau, onosa'i ma tauivi i mea faigata o le olaga. O le ala lea tatou te maua ai mea lelei mai le Atua, aua e silafia e Ia o tatou ala uma.

GALUEGA FA'ATINO: Tali Fesili nei –

1. O fea le nofoaga na tatalo ai Iona i le Atua?

Tali: O le manava o le i'a.

2. Aisea na valaau ai Iona i le Atua?

Tali: Aua ua puapuagatia o ia.

3. O le a le manatu o Iona ina ua feagai ma faigata?

Tali: Ua lafoa'iina o ia e le Atua.

4. O le a le mea e tupu i le tagata e le usita'i i mea fa'atauva'a ma fialia i le pepelo?

Tali: E lafoa'iina o ia ma le maua manuia mai le Atua.

5. Aisea ua toe faia ai e le Atua le olataga mo Iona?

Tali: Aua ua Ia fa'afogaina lana tatalo.

A'OA'OGA:

1. Tatalo i le Alii i so'o se taimi.
2. 'Aua e te alu 'ese mai a'oa'oga a matua.
3. A e le tigaina, e te le maua se mea lelei.

PESE: Ia saunia se pese, ma ia tofi se tama e fai le tatalo e fa'auma ai le vasega.

NOVEMA 28, 2021

MATAUPU 13: E LE LELEI LE FA'AMAUALUGA.

TUSI FAITAU: Luka 18: 9-14

SINI: Ia malamalama pea tamaiti, o le fa'amaualuga o se uiga le lelei ma inosia i fofoga o le Alii.

FESOASOANI MO FAIAOGA:

Tamaiti, o a nisi upu e tutusa ma le upu fa'amaualuga? O le fia sili, manatu maualalo i isi tagata; fia iloa ma le fia pule, ma isi lava uiga e tele e fa'amatalaina ai le fa'amaualuga. O lona uiga la, e le tatau lava ona tatou fa'amaualuga.

O le tusi faitau o le tatou mataupu, ua a'oa'o atu ai Iesu i ona so'o ma le motu o tagata i le tala fa'a-fa'ataoto. O le fa'ataoto, o se tala fa'a-fa'atusa i mea e masani ai le olaga o tagata, o lo'o i ai sona a'oa'oga fa'a-le-agaga mot agata e fa'alogologo ai. O le auala lea ua fa'aogaina e Iesu, e momoli atu ai lona finagalo paia, i amioga ma uiga tatau e ao ina ola ai le Kerisiano ua talitonu ia te Ia.

O le fa'ataoto la ua fetalai atu ai le Alii, e fa'atatau lea i tagata e to'alua na o a'e i le malumalu e tatalo ai. O i la'ua ia o le faresaio ma le tagata ao lafoga. Na tula'i muamua le faresaio ma fai lana tatalo. Ua ia fa'afetai i le Atua, on aua le pei ia o isi tagata, pei o fao mea, o e amio leaga, o e mulilulua, ma lena ao lafoga. Na ia fa'ailoa atu foi i le Alii, e ta'ilua i le vaiasosa ona agapogi ma e fai taulaga foi i le sefulua'i o ana mea e maua. I le tatalo a le faresaio, ua tatou iloa ai e pei e le'i alu i le malumalu e tatalo i le Atua. Ae na alu e fa'asalalau ma fa'ailoa i tagata o i ai, lona lelei ma lona tulaga ese mai i isi tagata. E foliga fa'amaualuga ana up una tautala ai, i lona fa'atusaina o lona sili atu i lo le ao lafoga.

Peita'i o le ao lafoga, ua tu mamao atu, ua le tepa a'e foi i le lagi, a ua popo lona fatafata, o fa'aailoga o le tagata agasala ua fia maua sona fa'amagaloga. Pau lava lana valaau – "Le Atua e, ia e alofa mai ia te a'u le tagata agasala." O upu a le tagata ua tatalo ma le iloa lelei, o ia o le tagata agasala ua aioi atu i le alofa o le Alii e fa'amagaloina ai o ia. O le valaau ua faia ma le loto maualalo i luma o le Atua.

Tamaiti, na talia e le Alii le tatalo a le ao lafoga. Na alu ifo o ia i lona fale, ua ta'uamiotonuina. Na lagona foi lona fiafia aua ua alofa le Alii i lona loto ua fa'amaualoina, e ala i ana upu ua ta'utino atu ai lona fa'atauva'a i luma o le Atua. Ioe, o le fa'afiaamiotonu e le fiafia i ai le Alii. Na te ta'ita'iina ai o tatou lagona i le fia iloa ma le fa'amaualuga. E le gata i lena, e vaai maualalo ai foi i isi tagata, ma saga le a'oa'oina ai foi se mea lelei mai le Alii. O le tatalo a le ao lafoga, o le tatalo foi lena e ao ina tatou faia, aua tatou te mo'omia le alofa o le Atua i so'o se aso o le ola. 'Aua e te fa'amaualuga i se taumafaiga ua e maua, ne'i vavae'eseina tatou mai fofoga o le Alii. Lagona pea le fa'atauva'a ma le fa'amaualalo i luma o le Atua.

GALUEGA FA'ATINO: Fa'amalamalama uiga o upu

1. fa'ataoto - o se tala fa'a-fa'atusa i fa'atinoga masani o le olaga, o i ai se a'oa'oga taua fa'a-le-agaga mo le Kerisiano.
2. faresaio - o se vaega o le lotu Iutaia, e tausisi ma fa'atauaina e i latou Tulafono o le Feagaiga Tuai ma faiga masani o le latou tapua'iga.
3. ta'uamionuina - ta'u leleia ma amio sa'o i luma o le Atua.
4. Tusi mai sau tatalo pu'upu'u pei o le tatalo a le ao lafoga.

PESE: Pese masani (Fai se tatalo mo a'u, o a'u foi mo oe)

Ia saunia se tatalo pu'upu'u, ae ia mulimuli atu ai le vasega i upu o le tatalo e fa'ai'u ai ma le vasega.

TESEMA 05, 2021

MATAUPU 14: O LE NOFOAGA NA FANAU AI IESU.

TUSI FAITAU: Mataio 2: 1-12

SINI: Ia malamalama atili pea le fanau i le fanau mai o Iesu i le fale o manu, o lo'o aumai ai ni a'oa'oga taua i lo tatou ola.

SINA FESOASOANI MO LE MATAUPU:

O le fesili, o fea na fanau ai Iesu? Lelei tele, o le tatou mataupu o lenei Aso Sa, e le o se mataupu fou mo i tatou. O le vaitau lava lenei i tausaga uma, e fa'amanatu ai pea e le lalolagi atoa le Afio mai o le Atua e ala i le Pepe o le Kerisimasi, o Ia o lo tatou Alii Fa'aola, o Iesu Keriso. O fuafuaga mamao a le Atua mo le fa'aolataga mo le lalolagi agasala. Ua leva ona valoia mai e Perofeta o le Feagaiga Tuai le soifua mai o le Alii Fa'aola (Mika 5:2), i le vaitau a'o tula'i mai Herota le tupu sau. Na fa'ate'ia Herota ina ua o'o atu Makoi e saili le nofoaga o lo'o soifua mai ai Iesu. Sa fesiligia e Herota ositulaga ma a'oa'o Tulafono pe moni le tala na ave atu e Makoi, ona latou tali lea i ai, sa valoia lava e Perofeta le fanau mai o le Mesia i le 'aai o Peteleema. O le ala lea na poloa'ina ai e Herota Makoi e o atu , afai latou te maua Iesu, ona ta'u atu lea ia te ia se'i alu atu ai e ifo ma vivi'i ia te Ia.

Ae peita'i o lona manatu e fia fasiotia ia Iesu. Na ta'ita'iina lava e le fetu Makoi i le nofoaga ton una fanau mai ai Iesu i le fale o manu. Sa o latou ifo ma vivi'i ma ave a latou meaalofa mo Ia. Ona toe foi ai lea o i latou i le isi auala e le'i iloa e Herota.

O le soifua mai o Iesu i le fale o manu, o le fa'ailoga lava o le Afio mai o le Atua i se ala maulalo. Sa manatu lava tagata Iutaia o le Mesia o lo'o fa'atalitali i ai o se Mesia e pei o se tupu malosi e mafai ona lavea'iina i latou mai le pule sau a le malo o Roma, peita'i e ese lava auala a le Atua mai manatu o tagata e to'atele.

E tele lava ni a'oa'oga taua i le soifua mai o Iesu i le fale o manu, e le gata o le momoli mai ai o le feau o le loto maulalo, agamalu, avanoa mo tagata uma, e le fia malualii, po'o le le fia fa'ailoaina o sona mamalu, o ia o se auauna mo tagata uma, ma isi lava a'oa'oga taua e mafai ona tatou maua i le soifua mai o Iesu i le fale o manu. O le fa'ata'ita'iga ua aumai e Iesu e tusa ai ma le tala, e tatau lava ona tatou fa'aoga ma ola ai i aso uma o le olaga.

GALUEGA FA'ATINO: Manaia ae fa'atino le tala i makoi, a ia aua le umi.

PESE: Vaaia le fetu, pupula mai le lagi
Le fa'ailoga, o le Afio mai
O le Alo e to'atasi.

A'OA'OGA:

1. O Iesu o le fetu pupula a le Atua
2. Fai sau meaalofa mo le Alii.
3. O Iesu le tupu ua fanau mai.

Ia fa'amanatu i tamaiti mo mataupu ua tuana'i aua le sauni atu mo le suega fa'ai'u. Ia fa'ai'u le vasega i se tatalo.

TESEMA 12, 2021

MATAUPU 15: SUEGA FA'AI'U O LE AFA MULIMULI O LE TAUSAGA.

SINI: Ia maua pea e tamaiti le fiafia e su'esu'e ina ia malamalama atili, ma ia taofi mau ai pea i tala o le Tusi Paia o lo'o a'oa'oina ai i latou.

FESOASOANI MO FAIAOGA:

Ia saunia lelei le suega fa'ai'u a le fanau, fa'amoemoe atu lava o le a tapena ni kopi o suega, e tu'u atu foi i le tou faitalia pe sui pe fa'aopoopo le suega ua tu'uina atu i le tusi. Ma ia tautuana ia fai ni nai fa'ailoga mo nai tamaiti e fa'auma ai le tausaga. Ia manuia le tapenaga.

Vaega I : Tali mai fesili nei.

1. O le a le mea e taua ai le tatalo?

Tali: E taua le tatalo, aua o le auala lea e feso'ota'i ai le tagata i le Atua.

2. E fa'afia ona tatalo Tanielu i le aso e tusa ai ma le mataupu sa fa'amatalaina?

Tali: E fa'atolu.

3. O le Afio mai o Iesu, e mo ai?

Tali: O le Afio mai o Iesu, e mo le lalolagi atoa.

4. O le a le uiga o le Tala Lelei?

Tali: O le tala i le alofa tunoa o le Atua e ala i le fa'aolataga ia Iesu Keriso.

5. O ai e fa'asino i ai le Tala Lelei?

Tali: O Iesu o le Tala Lelei.

6. O le a le uiga o le upu 'Aposetolo'?

Tali: O le ua auina atu, po'o le tagata ua tofia e le Atua e tala'i atu le Tala Lelei.

7. Aisea e taua ai le galulue fiafia?

Tali: A galulue fiafia, e mama ai galuega ma maua ai le manuia e pei ona ta'ua i le tala.

8. O a mea na sailia e le ava amio lelei e pei ona ta'ua i le tala?

Tali: Na ia sailia fulufulu mamoe ma lino.

9. O le a le taimi na valaau ai Iona i le Atua?

Tali: Na valaau ina ua feagai ma puapuaga.

10. O le a le i'uga o le tagata e le usita'i e pei o Iona lea sa ta'ua i le tala?

Tali: O le lafoa'iina ma na te le maua manuia mai le Atua.

Vaega II: Fa'afetaui upu ma o latou uiga.

1. fememea'i - o se tagata e maualuga lona tulaga po'o lona tofi
2. puapuagatia - o le ta'uuleleia po'o le amio sa'o i luma o le Atua
3. fa'ataoto - le mautonu po'o le fefe
4. ta'uamiotonuina - tigaina po'o le mafatia
5. malualii - o se tala fa'a-fa'atusa i fa'atinoga masani o le olaga, o i ai se a'oa'oga taua fa'a-le-agaga mo le Keriano.

Vaega III:

1. Tusi mai sau tala pu'upu'u e fa'amatala ai le taua o le 'Kerisimasi' i lou olaga.

Momoli atu le fa'afetai tele mo le fa'atinoina o la outou pitolaau fa'a-Faiaoga Aso Sa i lenei foi tausaga, malo le galulue fa'afetai le onosa'i, talitonu lava e le faigofie le galuega na feagai ma outou aemaise o lo outou taimi. Manatu foi sa tu'u mai lava lo outou tau'au e tausoa fa'atasi ai le tatou avega lea ua tau ai i manu le fa'amoemoe.

Ia manuia tele le malologa o le a feagai ai. Ia maua foi se Kerisimasi fiafia ma se Tausaga Fou manuia i le alofa mai o le Atua. Tatou toe feiloa'i ia Fepuari.

IA MANUIA LE KERISIMASI MA LE TAUSAGA FOU!!!